

# CONGREGATIO DE CAUSIS SANCTORUM

MEDIOLANENSIS

BEATIFICATIONIS et CANONIZATIONIS

SERVI DEI

**ANGELI RAMAZZOTTI**

VENETIARUM PATRIARCHAE

FUNDATORIS PONTIFICII INSTITUTI PRO MISSIONIBUS EXTERIS

(1800-1861)

---

## **DECRETUM SUPER VIRTUTIBUS**

«Magnus animus perfecti sacerdotis, evangelici apostoli, insignis Dei Ecclesiae praesulis».

Tantis verbis Patriarcha Cardinalis Angelus Roncalli, hodie Sanctus Ioannes XXIII, Servum Dei Angelum Ramazzotti appellabat, qui Sancti Marci Venetiarum in cathedra fuit antecessor, pastoris eius in populo vehementissime radicati et generose erga mundum sollertis spiritualem figuram describens.

Servus Dei die 3 mensis Augusti anno 1800 Mediolani natus est. Insequenti die sacro fonte lustratus eique nomen Angeli

Francisci impositum est. Ille cursum studiorum iuxta Universitatem Papiensem laurea in utroque iure anno 1823 perfecit. Duos annos post forenses partes recusavit, ut ad studia theologica accederet. Servus Dei die 13 mensis Iunii anno 1829 Mediolani sacros ordines suscepit eodemque die in numero Rhaudensium Missionariorum receptus est, qui sodalitium sacerdotum dioecesanorum ad praedicationem spiritualium meditationum et missionum in populum constituere. Ter officio superioris sodalitiis functus est.

Amor Evangelii et animarum sanctificationis eum perduxit ad eligendam immensam Ambrosianam dioecesim ut locum eius missionis. Usque ad recessa et impervia montium processit ut praedicaretur et sacramenta administraret sed etiam ut necessitates sociales et cotidianas suppeditaret necnon ut suo iuridico intellectu multa contentiosa pacificaret. Juvenum necessitudines valde percipiebat eo ut in quondam Sancti Francisci coenobio, quod ei hereditate perventum fuit in oppido Salomni, e quo eius parentes orti erant, instituit iuvenibus festivum oratorium et orphanotrophium in quo, anno 1848, post illas sicut dictas *Quinque Mediolanenses Dies* et filios militum Austriacorum recepit.

Papiensis electus Episcopus, die 30 mensis Iunii anno 1850 Romae consecratus est. Priusquam possessionem dioecesis acciperet, die 30 mensis Iulii Seminarium pro Missionibus Externis fundavit, adnectens in illo quod fuerat coenobio, sua proprietate, primum coetum illorum ad missionem candidatorum, ex quibus Ioannes Mazzucconi, qui primus illius Instituti martirio fidei testimonium perhibuit et qui in numerum Beatorum anno 1984 relatus est. Episcopus Lombardos in fundatione Servus Dei consilio suo secum traxit et omnes ergo pariter consociati Seminarii institutionis documentum die 1 mensis Decembris eiusdem anni

subscripserunt. Hoc modo Servus Dei ipsemet, qui propter superiorum oboedientiam vocationem ad missiones attendere non potuit, per foundationem primi Instituti Italici dioecesanorum sacerdotum et laicorum, qui speciatim ad missiones ad extra et ad gentes consecrati sunt, Providentiae mirabile instrumentum evenit.

Anno 1858 Summus Pontifex Pius IX ad sedem Patriarchalem Venetiarum dominum Ramazzotti provexit. Servus Dei illo munere tres per annos functus est, illo tempore magnam et multiformem actionem pastorem exercuit. Anno 1859 primum Concilium Provinciale Venetum indixit et praefuit et operam efficaciter contulit prima missionaria in expeditione anno 1860, Sororum Caritatis, quae dicuntur Mariae puellae, usque in Bengalam in India et Filiarum Caritatis quae dicuntur *Canossianae* in Siamkiamum.

Humilitas et caritas animum Servi Dei tota eius in vita notaverunt, sicut etiam spiritus privationis, qui ei suasit ne calefactione quidem eius in cubiculo contra hiemales rigores uteretur. Vitam suam summa paupertate ad modum Evangelii debebat pauperesque diligebat, quibus multa hospitia Papiae et Venetiis fundavit. Iuvenes mulieres audiendi et loquendi usu carentes valde curavit, enim istis scholas suis substantiis fundavit. Sollicitus fuit et erga iuvenes sine opere, quos e viis recepit eisque scholas vespertinas condidit, ut istis rectam intitutionem suppediaret. Anno 1855 flagrante terribili morbo choleric, Langobardorum magno excidio, ipsemet aegrotos in lazaretis ministrare voluit. Anno 1857 ille agros aquis Padi et Ticini mersos barca visitavit ut incolis domi praeclusis confortaret et subsidia praestaret.

Eius ardens fides summam aedificationem fidelibus porrigebat, ille multas per horas in orationem incumbibat, ecclesias in quibus Sanctissimum Sacramentum ostendebatur visitabat et ibique longa

adoratione commorabatur, erga Virginem Mariam singularem exercebat cultum praesertim sub titulo Perdolentis Matris et Reginae Apostolorum. Spiritualia exercitia omnibus clericis, laicis vel etiam viris et mulieribus carceratis ipsemet praestabat.

Pastoralibus consiliis Servus Dei magna prudentia, iustitia et paterna sollicitudine regebatur. Sacerdotes dogma Immaculatae Conceptionis reicientes convertere omnibus suis viribus temptavit, pro quibus suas orationes et privationes etiam sua in agonia offeruit. *Sacerdotes familiae* instituit, qui ad praedicationem variis in paroeciis maxime dediti erant vitamque communem cum iis ipse in episcopio degit. Etiam episcopus missionarios Instituti ab eo fundati, per mundi semitas ducere et animo benevolo et oratione comitari perrexit. Die 24 mensis Septembris anno 1861 mortali e vita migravit, tres dies prius quam rubrum biretum e manibus Beati Pii IX reciperet.

Die 23 mensis Maii anno 1926 Summus Pontifex Pius XI per decretum statuit ut Institutum pro Missionibus Exteris Mediolanense et Pontificium Seminarium Missionarium Sanctorum Apostolorum Petri et Pauli in Urbe coniungerentur in novo Pontificio Instituto Pro Missionibus Exteris (PIME).

Perdurante fama sanctitatis, a die 13 mensis Februarii anno 1976 ad diem 16 eiusdem mensis Februarii anno 1978 iuxta Curiam Mediolanensem celebratus est Processus dioecesanus, cuius iuridica validitas per decretum diei 4 mensis Decembris anno 1998 ab hac Congregatione de Causis Sanctorum est approbata. Exarata *Positione*, secundum normas canonicas disceptatum est an Servus Dei virtutes heroum in modum exercuisset. Positivo cum exitu, die 3 mensis Martii anno 2015 Peculiaris Congressus Theologorum auctus est et die 1 mensis Decembris eiusdem anni Ordi-

naria in Sessione Patres Cardinales et Episcopi se congregaverunt, me Angelo Cardinale Amato praesidente.

Facta demum de hisce omnibus rebus Summo Pontifici Francisco per subscriptum Cardinalem Praefectum accurata relatione, Sanctitas Sua, vota Congregationis de Causis Sanctorum excipiens rataque habens, hodierno die declaravit: *Constare de virtutibus theologalibus Fide, Spe et Caritate tum in Deum tum in proximum, necnon de cardinalibus Prudentia, Iustitia, Temperantia et Fortitudine, iisque adnexis, in gradu heroico, Servi Dei Angeli Ramazzotti, Venetiarum Patriarchae, Fundatoris Pontificii Instituti pro Missionibus Exteris (PIME), in casu et ad effectum de quo agitur.*

Hoc autem decretum publici iuris fieri et in acta Congregationis de Causis Sanctorum Summus Pontifex referri mandavit.

Datum Romae, die 14 mensis Decembris a.D. 2015.



ANGELUS Card. AMATO, S.D.B.  
*Praefectus*



✠ MARCELLUS BARTOLUCCI  
Archiep. tit. Mevaniensis  
*a Secretis*